

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A FEDERACIÓN DE MULLERES DO RURAL DA PROVINCIA DE LUGO, AFAMMER LUGO, PARA O DESENVOLVEMENTO DE ACTUACIÓNS DE FORMACIÓN E SENSIBILIZACIÓN SOBRE A VIOLENCIA DE XÉNERO NO MARCO DO PACTO DE ESTADO CONTRA A VIOLENCIA DE XÉNERO, PARA O ANO 2026

REUNIDAS

Dunha parte, dona Fabiola García Martínez, conselleira de Política Social e Igualdade, nomeada polo Decreto 44/2024, do 14 de abril, que actúa no nome e representación desta Consellería, no uso das facultades que lle veñen atribuídas no artigo 34 da Lei 1/1983 do 22 de febreiro, de normas reguladoras da Xunta e da súa Presidencia, así como no Decreto 42/2024, do 14 de abril, polo que se establece a estrutura orgánica da Xunta de Galicia, no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade e no establecido no Acordo do Consello da Xunta de Galicia, do 27 de marzo de 1991.

Doutra parte, Alicia López Rodríguez que actúa en nome e representación da Federación de Mulleres da provincia de Lugo_AFAMMER LUGO, con NIF G-72927957, en virtude da súa condición Presidenta, de acordo co nomeamento outorgado segundo o disposto no artigo 19 dos seus estatutos e na acta de constitución da Federación do día 17 de novembro de 2022, e as atribucións establecidas no artigo 23 dos estatutos.

Todas as partes recoñécense a súa capacidade para obrigarse e celebrar convenios e,

EXPOÑEN

I. Que as Administracións Públicas poden celebrar convenios de colaboración con outras administracións ou entes de dereito público e con persoas físicas ou xurídicas ao abeiro do disposto no capítulo VI do título preliminar da Lei 40/2015, do 1 de outubro, do réxime xurídico do sector público.

II. O Estatuto de Autonomía de Galicia no seu artigo 4.2 sinala que corresponde aos



poderes públicos de Galicia promover as condicións para que a liberdade e a igualdade do individuo e dos grupos en que se integran sexan reais e efectivas, remover os obstáculos que impidan ou dificulten a súa plenitude e facilitar a participación de todos os galegos na vida política, económica, cultural e social.

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coa habilitación competencial outorgada ás Comunidades Autónomas polo artigo 148.1.20 da Constitución española, ten competencia exclusiva en materia de asistencia social, polo que, na súa virtude aprobouse a Lei 13/2008, do 3 de decembro, de servizos sociais de Galicia.

III. O Decreto 139/2024, do 20 de maio, establece a estrutura orgánica da Consellería de Política Social e Igualdade e sinala no seu artigo 29 as competencias que lle corresponden á Dirección Xeral de Loita contra a Violencia de Xénero entre as que figuran as de impulsar as actuacións conducentes á eliminación da violencia de xénero nos termos establecidos na Constitución, no Estatuto de autonomía de Galicia, na Lei 11/2007, do 27 de xullo, galega para a prevención e o tratamento integral da violencia de xénero, modificada pola Lei 12/2016, do 22 de xullo, na Lei 7/2023, do 30 de novembro, para a igualdade efectiva de mulleres e homes de Galicia, e na demais lexislación aplicable na materia.

IV.- Que a violencia que nas súas distintas formas se exerce contra as mulleres supón un serio atentado contra a dignidade e a integridade física, psíquica e moral destas e, en consecuencia, unha grave e intolerable violación dos dereitos humanos.

Que entre os principios xerais que orientan o contido da Lei 11/2007, do 27 de xuño, atópase recollido no seu artigo 4, a equidade territorial, establecéndose que *"no desenvolvemento da rede de recursos e servizos de prevención, atención, apoio, tratamento e protección da violencia de xénero terase en conta a necesidade de compensar os desequilibrios territoriais, garantindo o seu acceso á totalidade das mulleres, especialmente ás que viven no ámbito rural"*.

Ademais, de conformidade co disposto no artigo 6 da dita Lei 11/2007, do 27 de xuño, o órgano competente en materia de igualdade, en coordinación cos restantes órganos da Xunta de Galicia, porá en marcha de xeito periódico, campañas de información e sensibilización que teñan como obxectivo mudar os estereotipos sexistas e que



incidan no rexeitamento social sobre todas as formas de violencia de xénero e remarcando, que se terán en conta as *“dificultades que teñen as mulleres do ámbito rural para acceder á información e, nese sentido, deseñaranse campañas específicas nese ámbito”*.

Así mesmo, ao abeiro do artigo 7.2 desta mesma norma, o órgano competente en materia de Igualdade establecerá axudas económicas destinadas a que o movemento asociativo en Galicia desenvolva actividades que promovan a prevención e a erradicación da violencia de xénero.

V. O día 25 de novembro de 2021, catro anos despois da aprobación do Pacto de Estado contra a Violencia de Xénero de 2017, a maioría dos grupos políticos con representación parlamentaria asinaron un acordo de renovación onde, novamente, se plasmou a vontade de todos os actores institucionais de seguir traballando polo cumprimento das medidas do dito Pacto de Estado contra a Violencia de Xénero e o establecemento dun marco ampliado e permanente para o desenvolvemento de políticas públicas que o fortalezan.

VI. En base ao anterior, o 22 de xullo de 2022 a Conferencia Sectorial de Igualdade aprobou o Acordo relativo ao establecemento dun marco de actuación conxunta que garanta a prórroga e permanencia das políticas públicas e os servizos que se derivan do Pacto de Estado contra a Violencia de Xénero. Este acordo ten como finalidade consolidar o traballo fronte á violencia contra as mulleres no conxunto do Estado, avanzando na institucionalización e a permanencia dos compromisos adquiridos no marco do Pacto de Estado contra a Violencia de Xénero. O 20 de marzo de 2023 publicouse no *Boletín Oficial del Estado* a Resolución do 16 de marzo de 2023, da Secretaría de Estado de Igualdade e contra a Violencia de Xénero, pola que se publica o Acordo da Conferencia Sectorial de Igualdade, de 3 de marzo de 2023, polo que se aproba o plan conxunto plurianual en materia de violencia contra as mulleres (2023-2027).

Este marco de cooperación articúlase a través dun Plan conxunto plurianual que inclúe un Catálogo de referencia de políticas e servizos en materia de violencia contra as mulleres, así como un Sistema común de información e avaliación.



O 26 de febreiro de 2025 o pleno do Congreso dos Deputados aprobou de maneira case unánime a renovación e actualización do Pacto de Estado contra a Violencia de Xénero. O acordo amplía as medidas que incluía no 2017, de 290 a 461 e introduce novos eixes como son a violencia vicaria, a económica e a dixital. Ademais préstaselle especial atención ás mulleres rurais e ás mulleres con discapacidade.

O capítulo 3 do Pacto de Estado recolle no seu punto 4 un apartado específico adicado ao rural, e nel establécense medidas que abranguen desde o incremento da atención ás vítimas nas zonas rurais cun maior número de centros de acollida e información; ao impulso ás asociacións de mulleres no ámbito rural; promover e apoiar as mesas de coordinación; a reforzar a presenza policial para a adecuada atención ás vítimas, e brindarlle ás vítimas unha atención e acompañamento efectivas e de calidade.

Así mesmo, a medida 41 do capítulo 1 do dito Pacto de Estado, Sensibilización e prevención, insta a reforzar as campañas de sensibilización contra a violencia cara as mulleres no ámbito rural, pola maior incidencia neste entorno.

VII. A Federación de Mulleres da provincia de Lugo_AFAMMER LUGO, é unha entidade de natureza asociativa e sen ánimo de lucro constituída ao abeiro da Lei orgánica 1/2002, do 22 de marzo, reguladora do dereito de asociación, co número 2023-025643-2 e coa finalidade de prestar servizos ás mulleres do rural de Lugo segundo as necesidades actuais da sociedade, tanto no ámbito da igualdade como no ámbito profesional e do emprego. Así mesmo está recoñecida e inscrita no Rexistro de Entidades Prestadoras de Servizos Sociais co número E7613.

A entidade ten entre os seus fins a defensa dos intereses e dereitos das mulleres do rural de Lugo, a defensa dos dereitos das mulleres do rural e dos/as menores en calquera situación de desamparo, en todos os ámbitos: social, cultural, laboral, familiar económico e político, con especial atención á defensa dos dereitos e liberdades das mulleres rurais con menores a cargo e das mulleres rurais vítimas da trata e explotación sexual; a denuncia expresa de toda discriminación cara á muller e os/as menores e a defensa e apoio ás mulleres rurais vítimas de violencia de xénero e aos fillos e fillas así como a impulsar a formación das mulleres do rural.

A Federación de Mulleres da provincia de Lugo_AFAMMER LUGO ten entre os



seus obxectivos os seguintes:

- Previr a violencia de xénero: sensibilizar a mozos e adultos sobre a violencia de xénero, as súas consecuencias e a importancia da convivencia respectuosa e saudable.
- Promover a igualdade de xénero: fomentar a igualdade de oportunidades, dereitos e responsabilidades entre homes e mulleres dende idades temperás, contribuíndo a cambiar actitudes e estereotipos de xénero.
- Involucrar as novas xeracións e a comunidade: crear un entorno inclusivo onde os valores da igualdade e respecto sexan parte integral do tecido social, abarcando tanto a menores como a maiores.

Para o ano 2026 a Federación de Mulleres da provincia de Lugo_AFAMMER LUGO, desenvolverá actuacións estruturadas de sensibilización, información e prevención da violencia de xénero no ámbito rural da provincia de Lugo con fin de contribuír á erradicación das condutas discriminatorias e á promoción dunha cultura baseada na igualdade, o respecto e a convivencia saudable.

O ámbito territorial de actuación abrangue a totalidade da provincia de Lugo, con especial atención ao medio rural, tendo en conta as particularidades derivadas da dispersión xeográfica, a menor densidade de poboación e as dificultades de acceso a recursos especializados.

VIII. A Consellería de Política Social e Igualdade considera necesario fomentar, coa concesión dunha subvención pública, a realización por parte da Federación de Mulleres da provincia de Lugo_AFAMMER LUGO, de actuacións de sensibilización fronte á violencia de xénero: actividades formativas, colaborativas, de apoio ás vítimas e de sensibilización. A concesión directa da subvención a través deste convenio efectuarase ao abeiro dos artigos 19.4.c) e 26 da Lei 9/2007, do 13 de xuño, de subvencións de Galicia, e o artigo 40 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, na que se prevé a posibilidade de excepcionalar do réxime ordinario de concorrencia competitiva en base ao carácter singular das subvencións e razóns de interese público, social e humanitario, cal é este caso, no que o interese prioritario é poder ofertar ás mulleres e mocidade do ámbito rural de Lugo as ditas actuacións de formación, sensibilización e prevención da violencia de xénero.



Pola súa dimensión e capacidade de chegar a un importante número de mulleres da provincia de Lugo, a Federación de Mulleres do Rural da provincia de Lugo_AFAMMER LUGO reúne as condicións para o desenvolvemento de actuacións de formación e sensibilización sobre a violencia de xénero, actuacións que non pode asumir outra asociación destas características en Galicia por ser AFAMMER_LUGO a única entidade existente na provincia de Lugo que reúne as condicións para realizar as ditas actuacións.

Por todo o indicado, todas as partes acordan formalizar o presente Convenio de Colaboración, que se rexerá conforme ao disposto nas seguintes:

CLÁUSULAS

PRIMEIRA.- Obxecto e finalidade

O obxecto deste Convenio é instrumentar a concesión dunha subvención de carácter directo en beneficio da Federación de Mulleres da provincia de Lugo_AFAMMER LUGO, para a realización dun programa de actividades de sensibilización fronte á violencia de xénero: actividades formativas, colaborativas, de apoio ás vítimas e de sensibilización. O programa estrutúrase en distintas liñas de intervención, atendendo aos diferentes perfís de poboación destinataria e garantindo unha abordaxe integral da prevención da violencia de xénero no ámbito rural.

As actividades a realizar neste ano 2026, son as seguintes:

1. Actuacións dirixidas á mocidade: estas actuacións teñen como finalidade fomentar a igualdade desde idades temperás e promover a identificación e prevención de condutas asociadas á violencia de xénero.

Inclúen:

- Obradoiros de sensibilización sobre igualdade de xénero, orientados á comprensión dos conceptos básicos de igualdade, á identificación de roles tradicionais e á promoción dunha cultura baseada no respecto e na corresponsabilidade.
- Actividades para a identificación de sinais de control nas relacións, centradas na detección temperá de condutas asociadas á violencia psicolóxica, física ou dixital, facilitando ferramentas para recoñecer situacións de risco e actuar de maneira adecuada.
- Dinámicas participativas orientadas á reflexión crítica sobre estereotipos,



destinadas a cuestionar crenzas e expectativas sociais vinculadas ao xénero, promovendo unha análise consciente das desigualdades estruturais.

- Actividades de educación emocional e respecto dirixidas a reforzar a identificación e expresión adecuada das emocións, a escoita activa e a resolución pacífica de conflitos. As intervencións desenvolveranse mediante metodoloxía participativa, adaptada á idade do alumnado e centrada na aprendizaxe activa.

2. Actuacións dirixidas a nenos e nenas en campamentos de verán: durante o período estival desenvolveranse actuacións específicas en campamentos, co obxectivo de integrar a educación en igualdade e o respecto nas actividades lúdico formativas propias desta etapa.

As actividades inclúen:

- Actividades de educación emocional, dirixidas a facilitar a identificación, comprensión e expresión adecuada das emocións, reforzando a empatía e a xestión positiva dos conflitos.

- Contos e relatos que promovan modelos igualitarios, mediante a lectura, análise e creación de historias que rachen cos estereotipos tradicionais de xénero e visibilicen referentes diversos e inclusivos.

Estas actuacións buscan reforzar valores de igualdade nun contexto educativo non formal.

3. Actuacións dirixidas a persoas adultas, a integrantes de asociacións, entidades e empresas do ámbito rural: estas actuacións teñen como finalidade reforzar o coñecemento sobre igualdade e prevención da violencia de xénero no contexto laboral e comunitario.

Inclúen:

- Formación sobre igualdade de xénero e políticas inclusivas, orientada a reforzar o coñecemento do marco normativo aplicable, promover a incorporación da perspectiva de xénero nas entidades e fomentar boas prácticas no ámbito laboral e asociativo.

- Obradoiros de prevención do acoso sexual, centrados na identificación de condutas constitutivas de acoso, na análise de situacións prácticas e na difusión de protocolos de actuación e vías de denuncia.



- Espazos de reflexión sobre barreiras estruturais e estereotipos, destinados a analizar os factores culturais, sociais e económicos que perpetúan desigualdades, promovendo unha visión crítica e propostas de mellora no contexto do medio rural.

A intervención pretende fortalecer o compromiso comunitario na loita contra a violencia de xénero.

4. Desenvolvemento dunha campaña de sensibilización: orientada á difusión de mensaxes de prevención e igualdade coa elaboración de materiais gráficos e audiovisuais, incluíndo carteis, folletos orientados á prevención da violencia de xénero.

SEGUNDA.- GASTOS SUBVENCIONABLES

De acordo co previsto no artigo 29 da Lei 9/2007, do 13 de xuño, de subvencións de Galicia, consideraranse subvencionables os gastos que, sen admitir dúbida, respondan á natureza da actividades que conforman o programa subvencionado e que sexan realizados e pagados entre o **1 de xaneiro de 2026 e o 30 de novembro de 2026**. En ningún caso o custo de adquisición dos gastos subvencionables poderá ser superior ao valor de mercado.

A tipoloxía de gastos subvencionables correspóndese con gastos de subministración e servizos derivados das actividades que conforman o programa a desenvolver subvencionado a través deste convenio.

TERCEIRA.- FINANCIAMENTO

A previsión do orzamento de gastos para a realización das actuacións que conforman o programa subvencionado a través deste convenio que ten previsto desenvolver a Federación de Mulleres da provincia de Lugo_AFAMMER LUGO ascende á cantidade de 20.000 €.

Para o cumprimento das actuacións deste programa, da Federación de Mulleres da provincia de Lugo_ AFAMMER LUGO, de sensibilización fronte á violencia de xénero: recollidas na cláusula primeira para o ano 2026 a Consellería de Política Social e Igualdade achegará a cantidade de **20.000 € (vinte mil euros)** con cargo á aplicación orzamentaria 08.06.313D.481.2 (código de proxecto 2018 00112) dos orzamentos xerais da Comunidade Autónoma de Galicia para o ano 2026.



O presente financiamento enmárcase nos fondos do Pacto de Estado contra a Violencia de Xénero do Ministerio de Igualdade, correspondentes á Comunidade Autónoma de Galicia.

CUARTA.- XUSTIFICACIÓN E PAGAMENTO

A xustificación dos gastos e o seu pagamento realizarase a través de conta xustificativa nos termos establecidos na Lei 9/2007, do 13 de xuño, e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, mediante a presentación, pola entidade beneficiaria, da seguinte documentación:

- **Memoria de actuación**, suscrita polo órgano competente da entidade beneficiaria, xustificativa do cumprimento das condicións impostas na concesión da subvención, con indicación do número total de actividades realizadas, a descrición das mesmas, o número de persoas usuarias, as localidades e provincias onde se desenvolveu cada actividade e dos resultados obtidos.

A memoria irá acompañada dun exemplar de todos os materiais elaborados ao abeiro das actividades realizadas, que conforman o programa a subvencionar a través deste convenio, nos que deben figurar os logos da Consellería de Política Social e Igualdade e do Ministerio de Igualdade. Como anexo a dita memoria deben achegar unha ficha cuantitativa segundo o modelo facilitado pola Dirección Xeral de Loita contra a Violencia de Xénero.

- **Certificación** expedida polo órgano competente da Federación de Mulleres da provincia de Lugo_AFAMMER LUGO dos gastos realizados, con identificación das persoas acreedoras cos seus NIF, os documentos xustificativos, os importes e, de ser o caso,,datas de pagamento.
- **Facturas** ou documentos de valor probatorio equivalente no tráfico xurídico mercantil ou con eficacia administrativa, incorporados na relación á que se fai referencia no parágrafo anterior e a documentación acreditativa do pagamento. Acompañarase unha declaración asinada polo órgano competente da entidade beneficiaria indicando que as facturas orixinais están en poder desta entidade.

Non se admitirán os pagamentos en efectivo.



- **Gastos de persoal:** Relación nominal dos traballadores/as que se inclúen como xustificación das actividades a subvencionar a través deste convenio que deberá indicar os seguintes datos: mes que se xustifica, apelidos, nome, e NIF da persoa traballadora, base do Imposto da Renda das Persoas Físicas, retribución líquida e bruta mensual de cada unha delas, data de pagamento das retribucións, importe da seguridade social con cargo á entidade beneficiaria, data de pagamento da seguridade social, porcentaxe de imputación e importe mensual total imputado. Ademais deberanse achegar os documentos que acrediten os custos de persoal: copia das nóminas e relación nominal de traballadores (RNT) e o seu pagamento achegando os xustificantes bancarios das nóminas e recibos de liquidación á Seguridade Social (RLC).

Cando formen parte da conta xustificativa documentos de gastos de 2026 que leven consigo ingresos a conta do IRPF ou cotas por seguros sociais liquidables con posterioridade á data de xustificación, o importe destes ingresos ou cotas considerárase xustificado coa presentación do documento de gasto, factura ou documento equivalente, no que se reflecta o importe da retención ou cotización xerada na data de xustificación, quedando a entidade beneficiaria obrigada a presentar os documentos acreditativos da súa liquidación nos dez días seguintes ao remate dos prazos legalmente establecidos para o seu ingreso no período voluntario; en todo caso a dita presentación terá como data límite o derradeiro día do mes seguinte ao último trimestre do exercicio da vixencia deste convenio.

- **Declaración responsable** de non ter solicitado ou percibido outras axudas para a mesma finalidade procedentes das distintas administracións públicas ou doutros entes públicos ou privados, nacionais ou internacionais.
- **Certificacións acreditativas** de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da comunidade autónoma
- **Tres orzamentos** que, no seu caso, debeu ter solicitado a entidade beneficiaria en aplicación do artigo 29.3 da Lei 9/2007, do 13 de xuño.

A xustificación deberá presentarse na Dirección Xeral de Loita contra a Violencia de Xénero con data límite do **4 de decembro de 2026**.



Á vista desta documentación a Consellería de Política Social e Igualdade, comprobará a realización das actividades que comprenden o programa a subvencionar a través deste convenio e o cumprimento da finalidade da subvención e, unha vez comprobado o cumprimento, expedirá certificado acreditativo da verificación realizada e tramitará o pagamento.

Se o importe xustificado fose menor ao previsto na cláusula cuarta deste convenio e sempre que se cumpra coa finalidade para a que se concedeu a subvención, procederá o seu pagamento na contía que sexa obxecto de xustificación.

A Consellería de Política Social e Igualdade, a través da Dirección Xeral de Loita contra a Violencia de Xénero, reservarase o dereito a solicitar toda a documentación que se considere precisa en relación coa xustificación das actividades que comprenden o programa a subvencionar a través do presente convenio.

QUINTA.- INEXISTENCIA DE RELACIÓN LABORAL

Para levar a cabo os obxectivos e fins das actividades que comprenden o programa a subvencionar a través deste convenio a entidade beneficiaria poderá contratar, con cargo ao orzamento previsto na cláusula terceira, o persoal que, no seu caso, precise para o seu desenvolvemento.

A subscrición do presente convenio non implicará relación laboral ou de calquera outra natureza entre as persoas ou profesionais que desenvolvan as actividades dependentes da Federación de Mulleres da provincia de Lugo_AFAMMER LUGO.

Á Consellería de Política Social e Igualdade non se lle poderá esixir ningunha responsabilidade directa nin subsidiaria en relación a este persoal.

SEXTA.- PAGAMENTOS ANTICIPADOS E PAGAMENTOS A CONTA

Poderanse realizar pagamentos anticipados, logo da solicitude da entidade, que suporán entregas de fondos con carácter previo á xustificación, como financiamento necesario para poder levar a cabo as actuacións previstas, atendendo aos límites máximos establecidos no artigo 63.1.Un do Decreto 11/2009, do 8 de xaneiro, que recolle que: *"Cando o importe da subvención non supere os 18.000 euros as bases reguladoras poderán prever a concesión de pagamentos anticipados de ata un 80% da subvención concedida e sen que se supere a anualidade prevista en cada exercicio orzamentario. Cando o importe da subvención concedida supere os 18.000 euros as*



bases reguladoras poderán prever, ademais, pagamentos anticipados dun 10% adicional sobre o importe que exceda os 18.000 euros e sen que se supere a anualidade prevista en cada exercicio orzamentario". A porcentaxe de anticipo concedido é do 73%.

Poderanse realizar pagamentos a conta conforme ao artigo 62 do Decreto 11/2009, do 8 de xaneiro, que poderán supoñer a realización de pagamentos fraccionados que responderán ao ritmo da execución das actividades que conforman o programa a subvencionar a través deste convenio, aboándose por contía equivalente á xustificación presentada. Para proceder ao seu pagamento, a entidade beneficiaria deberá enviar a documentación xustificativa relacionada na cláusula cuarta, agás a memoria de actuación.

Segundo o sinalado no artigo 62.2 do Decreto 11/2009, do 8 de xaneiro, o importe conxunto dos pagamentos a conta e dos pagamentos anticipados que, de selo caso, se concedesen, non poderá ser superior ao 80% do porcentaxe subvencionado correspondente aos pagamentos xustificados, nin excedera da anualidade prevista en cada exercicio orzamentario.

SÉTIMA .- TRAMITACIÓN NA SEDE ELECTRÓNICA DA XUNTA DE GALICIA

A documentación relativa á tramitación deste convenio presentarase por medios electrónicos a través da sede electrónica da Xunta de Galicia (<https://sede.xunta.gal>). Para estes efectos empregarase o procedemento PR004A, que ten por obxecto a presentación electrónica de solicitudes, escritos e comunicacións que non contén cun sistema electrónico específico establecido na normativa reguladora de cada procedemento nin cun modelo electrónico normalizado.

A entidade beneficiaria responsabilizarase da veracidade dos documentos que presenten. Excepcionalmente, a Administración poderá requirir a exhibición do documento orixinal para o cotexo da copia electrónica presentada.

No caso de que algún dos documentos que se van presentar de forma electrónica supere os tamaños máximos establecidos ou teña un formato non admitido pola sede electrónica da Xunta de Galicia, permitirase a súa presentación de forma presencial dentro dos prazos previstos e na forma indicada no parágrafo anterior. A información actualizada sobre o tamaño máximo e os formatos admitidos pode consultarse na sede electrónica da Xunta de Galicia.



OITAVA.- NOTIFICACIÓNS

As notificacións practicaranse por medios electrónicos nos termos previstos na normativa reguladora do procedemento administrativo común.

As notificacións electrónicas realizaranse mediante o Sistema de notificación electrónica de Galicia-Notifica.gal, dispoñible a través da sede electrónica da Xunta de Galicia (<https://sede.xunta.gal>). Este sistema remitirá avisos de posta a disposición das notificacións á conta de correo electrónico e/ou teléfono móbil facilitados pola entidade. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

Neste caso a entidade beneficiaria deberá crear e manter o seu enderezo electrónico habilitado único a través do Sistema de Notificación Electrónica de Galicia – Notifica.gal, para todos os procedementos administrativos tramitados pola Administración xeral e do sector público autonómico. En todo caso, a Administración xeral poderá, de oficio, crear o indicado enderezo, aos efectos de asegurar o cumprimento polas persoas interesadas da súa obriga de relacionarse por medios electrónicos.

As notificacións entenderanse practicadas no momento en que se produza o acceso ao seu contido e entenderanse rexeitadas cando transcorresen dez días naturais desde a posta á disposición da notificación sen que se acceda ao seu contido.

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

NOVENA.- OBRIGAS DA ENTIDADE BENEFICIARIA

En cumprimento do artigo 11 da Lei 9/2007, do 13 de xuño, e do Decreto 11/2009, do 8 de xaneiro, son obrigas da Federación de Mulleres da provincia de Lugo_AFAMMER LUGO como entidade beneficiaria:

- Desenvolver as actividades que conforman o programa a subvencionar a través deste convenio recollidas na cláusula primeira , e xustificar a súa realización e o cumprimento da finalidade que determinou a concesión da subvención, sen percibir ningunha remuneración por parte das persoas usuarias.



- Realizar a divulgación destas actividades segundo as instrucións que determine a Consellería de Política Social e Igualdade e facer constar expresamente en toda publicidade ou presentación pública que se realice o logotipo da Xunta de Galicia, así como que as axudas están a ser financiadas con fondos do Pacto de Estado contra a Violencia de Xénero do Ministerio de Igualdade, deixando constancia, se fora o caso, na sinalización exterior dos lugares onde se realicen estas actividades, e sempre nas de difusión, que estas se financian cos mencionados fondos, así como incluír o logotipo do Ministerio de Igualdade ademais do da Xunta de Galicia e demais logotipos estipulados pola Comunidade Autónoma de Galicia.
- Presentar, antes da sinatura deste convenio, as certificacións acreditativas de estar ao no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da comunidade autónoma, así como unha declaración responsable de non estar incurso en ningunha das prohibicións para obter a condición de beneficiaria, establecidas no artigo 10 da Lei 9/2007, do 13 de xuño, de conformidade co disposto nos artigos 10 e 13 do Decreto 11/2009, do 8 de xaneiro así como cumprir o resto das obrigas recollidas no artigo 11 da devandita lei e na Lei 38/2003, de 17 novembro, xeral de subvencións.
- Empregar a lingua galega en todas as actividades que conforman o programa a subvencionar a través do presente convenio, incluíndo a información en páxinas web. Non obstante o anterior, empregarase a lingua castelán se esta é requirida.
- Ser titular e suxeito pasivo de todas as obrigas tributarias fronte á Administración e a Seguridade Social correspondentes ás actividades das que se derive o pagamento de impostos, retencións e cotas que levan consigo a realización do programa a subvencionar a través do presente convenio.
- Someterse ás actuacións de supervisión e control dos órganos da Administración do Estado e da Comunidade Autónoma e da Consellería de Política Social e Igualdade.
- Facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control do destino das axudas.



- Comunicar á Consellería de Política Social e Igualdade calquera modificación das condicións tidas en conta para a concesión da subvención, así como dos compromisos e obrigas asumidas e, de ser o caso, a obtención concorrente de subvencións ou axudas para a mesma finalidade procedentes de calquera Administración ou ente público nacional ou internacional. Esta comunicación deberá efectuarse tan pronto como se coñeza e, en todo caso, con anterioridade á xustificación da aplicación dos fondos recibidos.
- Reintegrar a subvención percibida no caso de incumprimento das condicións establecidas para a súa concesión.
- Tratar dun xeito confidencial toda a información recibida directa ou indirectamente e a non utilizar ningún dato desa información de maneira distinta das actividades que conforman o programa a subvencionar a través do presente convenio. Así mesmo queda obrigado a manter de forma confidencial e a non revelar ningún dato da información coñecida, sen o consentimento previo, de conformidade coa normativa de protección de datos.
- Subministrar á Consellería de Política Social e Igualdade, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento, por este órgano, das obrigas previstas no Título I da citada lei. O incumprimento desta obriga determinará, se é o caso, a imposición das multas coercitivas previstas no número 4 do citado artigo.
- As demais obrigas previstas no artigo 11 da Lei 9/2007, do 13 de xuño.

DÉCIMA .- CAUSAS DE RESOLUCIÓN.

Serán causas de resolución do presente convenio:

- O incumprimento total ou parcial de calquera das cláusulas que o regulan.
- A aplicación dos fondos a fins distintos de aqueles que motivaron a concesión da subvención.
- O transcurso do tempo fixado sen que se execute o programa obxecto da subvención.
- As establecidas nos artigos 32 e 33 da Lei 9/2007, do 13 de xuño, procedendo, se fóra



o caso, ao reintegro total ou parcial da axuda percibida e dos xuros de demora acumulados dende o momento do seu pago ata a data na que se acorde a orixe do reintegro.

De resolverse o convenio, a Consellería de Política Social e Igualdade poderá esixir o reintegro das cantidades achegadas. Igualmente se procederá, de conformidade co disposto no artigo 17.3 da Lei 9/2007, do 13 de xuño, no suposto de que o importe da axuda, illada ou en concorrencia con outras subvencións, axudas, ingresos ou recursos supere o custo das actividades que conforman o programa a subvencionar a través deste convenio.

En canto aos efectos estarase ao disposto no artigo 52 daei 40/2015, do 1 de outubro, do réxime xurídico do sector público .

DECIMO PRIMEIRA.- REINTEGRO

A axuda concedida ao amparo deste convenio poderá ser obxecto de modificación, revogación ou reintegro total ou parcial, xunto cos xuros de demora, cando concorran as circunstancias previstas no artigos 33 da Lei 9/2007, do 13 de xuño, no Decreto 11/2009, do 8 de xaneiro, e na Lei 38/2003, do 17 novembro.

De acordo co artigo 14.1 n) da Lei 9/2007, do 13 de xuño, os criterios de graduación dos posibles incumprimentos para determinar a cantidade a minorar ou reintegrar serán os seguintes:

- o incumprimento total do programa para o que se concede a subvención, da realización das actividades que o comprenden ou da obriga de xustificación dará lugar á perda do dereito ao cobro ou, no seu caso ao reintegro da totalidade da axuda percibida.
- calquera outro incumprimento considerárase incumprimento dos fins para os que se concedeu a axuda, da realización das actividades que conforman o programa a subvencionar a través deste convenio ou da obriga da xustificación, e dará lugar á perda do dereito ao cobro ou, no seu caso, ao reintegro na porcentaxe correspondente ao investimento non efectuado ou non xustifico.

En caso de incumprimento do presente convenio, transgresión na súa execución ou desestimento pola outra parte, procederase á súa inmediata resolución. Concorridos



tales supostos reintegrarase ao Tesouro da Xunta de Galicia as contías aboadas cos xuros a que dean lugar, de conformidade coa normativa autonómica de aplicación e nos prazos máis perentorios que esta dispuxese.

Toda alteración das condicións tidas en conta para a concesión desta axuda, e en todo caso a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación da contía da axuda contemplada no presente convenio.

DÉCIMO SEGUNDA .- COMPATIBILIDADE

Esta axuda é incompatible coa obtención doutras subvencións, axudas, ingresos ou recursos doutras entidades para a mesma finalidade procedentes de calquera Administración ou entes públicos ou privados, nacionais, da Unión Europea ou de organismos internacionais.

DÉCIMO TERCEIRA.- PROTECCIÓN DE DATOS

1. As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo a protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

2. Os datos persoais recadados neste convenio serán tratados na súa condición de responsable pola Xunta de Galicia – Consellería de Política Social e Igualdade coa finalidade de levar a cabo a tramitación administrativa que se derivada da xestión da concesión directa da subvención a través do dito convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

3. O tratamento dos datos baséase no cumprimento dunha misión de interese público ou no exercicio de poderes públicos, conforme as referencias recollidas no enlace



<https://www.xunta.gal/informacion-xeral-proteccion-datos>, derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable, de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro e, en concreto, a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

4. A referencia á publicidade, en cumprimento da normativa de transparencia e subvencións, axustarase a dita normativa e coas limitacións que esta establece.

5. Como destinatarias, os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que a cidadanía poida acceder de forma integral á información relativa a unha materia.

6. As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

DÉCIMO CUARTA.- PUBLICIDADE

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2007, do 13 de xuño e no Decreto 132/2006, do 27 de xullo, polo que se regulan os rexistros públicos creados nos



artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes consenten dar publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto.

Por outra banda, en cumprimento do disposto nos artigos 18 e 20.8 da Lei 38/2003, do 17 de novembro, comunicarase a subscrición deste convenio á Base de Datos Nacional de Subvencións, que opera como sistema nacional de publicidade de subvencións.

DÉCIMO QUINTA.- MODIFICACIÓN DO CONVENIO

Toda alteración das condicións tidas en conta para a concesión da subvención dará lugar á modificación do convenio, sendo de aplicación as previsións ao respecto contidas na Lei 9/2007, de 13 de xuño, e no regulamento da dita lei.

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

De conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e polas entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostibilidade financeira.

DÉCIMO SEXTA.- RÉXIME XURÍDICO DO CONVENIO

Este convenio ten carácter administrativo rexéndose polas cláusulas que nel se establecen e, no seu defecto, polo disposto na Lei 40/2015, do 1 de outubro, pola Lei 39/2015, do 1 de outubro, e subsidiariamente, e para o caso de formularse dúbidas ou lagoas, polos principios da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

Seralle de aplicación o réxime determinado pola Lei 9/2007, do 13 de xuño e polo Decreto 11/2009, de 8 de xaneiro.



En todo caso, o convenio non se atopa comprendido en ningún dos contratos regulados pola Lei 9/2017, de 8 de novembro.

As cuestións litixiosas xurdidas da interpretación, desenvolvemento e aplicación do convenio serán resoltas pola Consellería de Política Social e Igualdade, poñendo os seus acordos fin á vía administrativa.

Contra estes acordos cabe interpoñer, potestativamente, recurso de reposición no prazo dun mes, ante o mesmo órgano que ditou a resolución, se o acto fora expreso; se non o fora poderá interpoñer o recurso de reposición en calquera momento a partir do día seguinte a aquel en que se produza o acto presunto, de conformidade co disposto nos artigos 123 e 124 da Lei 39/2015, do 1 de outubro.

Directamente poderá formular un recurso contencioso-administrativo, no prazo de dous meses contados desde o día seguinte á notificación do acto que poña fin á vía administrativa, se acto fora expreso; se non o fora poderá formular o recurso contencioso-administrativo, no prazo de seis meses que se contará para a persoa solicitante e outros posibles interesados, a partir do día seguinte a aquel en que se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso – administrativa.

Para tales efectos o tribunal competente será o Tribunal Superior de Xustiza de Galicia.

DÉCIMO SÉTIMA .- COMISIÓN DE SEGUIMIENTO

Para o seguimento e coordinación das actividades previstas no presente convenio crearase unha comisión mixta e paritaria na que estarán representadas as partes que o asinan. Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións estipuladas no presente convenio, e estará formada por dúas persoas representantes da Consellería de Política Social e Igualdade e dúas persoas representantes da Federación de Mulleres da provincia de Lugo_AFAMMER LUGO designadas polas persoas que representen a cada unha das partes, así como as súas suplentes.

A persoa que ocupe a presidencia será unha das persoas representantes da Administración, designada pola persoa titular da Dirección Xeral de Loita contra a



Violencia de Xénero.

A persoa que ocupe a secretaría, así como a súa suplencia, será unha persoa adscrita á Dirección Xeral de de Loita contra a Violencia de Xénero, designada pola persoa que asuma a Presidencia, que actuará con voz pero sen voto.

A actuación da Comisión de seguimento axustarase ao establecido nos preceptos básicos da Lei 40/2015, do 1 de outubro, e na Lei 16/2010, de 17 de decembro, de organización e funcionamento da administración xeral e do sector público autonómico de Galicia.

DÉCIMO OITAVA.-VIXENCIA

O presente Convenio producirá efectos a partir da súa sinatura e ata o 31 de decembro de 2026. Non obstante, os gastos das actuacións a subvencionar a través do presente convenio que realizase a entidade dende o 1 de xaneiro ata o 30 de novembro de 2026 tamén poderán ser subvencionadas ao seu abeiro coa achega da Consellería de Política Social e Igualdade.

E, en proba de conformidade cos termos do Convenio, asínase o mesmo na data da sinatura dixital.

A CONSELLEIRA DE POLÍTICA SOCIAL E IGUALDADE A FEDERACIÓN DE MULLERES DO RURAL DA PROVINCIA
DE LUGO_AFAMMER LUGO

Fabiola García Martínez

Alicia López Rodríguez

